



Amy Lecteur.

Comme ainsi soit que l'industrie humaine se soit efforcee de tous temps à esgaler les œuvres aux merueilles de la nature, & en cela se soit serui de la force de l'homme, comme à diuiser l'espaissieur des plus larges montaignes, les aplanir, voire mesme de les aneantir & faire passage aux trauers de leurs entrailles, aux riuieres & fleuues les plus esloignez pour les ioindre ensemble, afin d'en tirer tout plain de commodités: les vns n'ayant esgard qu'à l'infinité multitude & nombre de leurs armées, les autres à la necessité du Commerce.

Ces mesmes artifices n'ont esté enseuelies avec les anciens, ains leur memoire & l'exercice nous est demeuré comme hereditaire, iournellement en void on les effets.

La Serenissime Princeſſe Isabella, Clara, Eugenie Gouvernante pour sa Maieſté Catholique es pays bas, soit de son propre mouuement (comme celle à qui est demeuré le soing de ses Prouinces) ou soit par l'aduis des autres (comme des Messieurs le Marquis de Spinola tres-sage & vaillant Capitaine, le Duc de Neuburch, l'Archeuesque de Couloigne & plusieurs autres Seigneurs circonuoisins interessez de l'aduerte partie.) Elle a fait commencer vn canal afin de ioindre deux riuieres ensemble à force de bras & de grand travail, à sçauoir le Rhin à la Meuse: ce qui pourroit apporter beaucoup de commoditez si le tout peut reüssir à son desir. Ce sujet neantmoins ne semble pas estre la seule cause de ce tant penible ouurage, selon l'opinion de plusieurs qui estiment cecy plustost estre inuenté pour conseruer son pays des courses iournalieres de l'ennemy, & empescher le pillage coustumier du Soldat Hollandois, & nonobstant qu'elle possede forces villes & forteresses esdits pays bien pourueuz des garnisons. ils n'ont pas laissé plusieurs fois d'entrer en ses terres, tantost à grandes, ores à petites troupes, & par autres stratagemes de guerre, pillant, rançonnant, amenant Prisonniers, desolant non pas seulement le pays de la Serenissime Princeſſe, mais aussi le pays de Iuliers, l'Archeuesché de Couloigne, Limbourg, &c.

Ce fut l'annee passee que ses desseins sortirent effect, & que l'on mit en execution le commandement de la Serenissime Princeſſe pour faire ce canal. On conduit sur les lieux vne Armee sortable commandee par le Comte Henry de Bergues, tant pour defendre les ouuriers qui trauailent à grand nom-

bre, que pour ordonner & bastir quantité de forteresses, lesquelles conserueront tout le pays en deça du canal.

Ce canal a de longueur huit milles du pays bas, elle prend son circuit au dessouz de Rynsbegue ainsi que vous pouuez aisement remarquer cy dessus en ceste carte, & se va rendre au dessouz de Venlo pour se ioindre à la Meuse: Elle est à present large de 50. pieds, & profonde de 10. pieds, creusee & conduite depuis Rynsbegue iusques à Gueldre à present, le reste depuis Gueldre iusques à Venlo desseigné seulement, les forteresses de cedit quartier à plus pres faittes, ils poursuiuent tousiours de trauailler ledit canal: Ces premiers commencemens ne sont que pour arrester l'ennemy & empescher ses incursions, mais lors qu'on sera paruenü à Venlo on recommencera de nouveau à eslargir & profondier ledit canal de 100. pieds de large & 20. pieds de profondeur.

C'est la croyance commune, que si cela peut reüssir côme ils esperent que le profit en sera inestimable, le Commerce facile & le voyage sans peril: car pour plus d'assurance ils mettront Nauires de guerre entre les forts pour deffence des Marchands passans.

Le tout a esté prudemment proiecté par cette illustre & tres-sage Princeſſe, au grand interest & perte des Estats de Hollande, leur retrenchant le passage ordinaire, car les marchandises lesquelles cy-deuant on amenoit des Allemagnes en Hollande par bateau & en passant payoient des tributs au grand profit des Estats de Hollande, & puis à grand prix & perte s'alloient finalement rendre es pays de la Serenissime Princeſſe pour distribuer leurs marchandises, lesquelles sans difficulté & de si grandes traueses avec peu de frais se viendront delcharger en ses terres.

On dist de surplus, & cecy aueré de gens de foy, qu'on va faire ioindre depuis Venlo encore la Meuse à Lescault, dict en Flamand le Schelde, au trauers de Brabant au dessouz de la ville d'Anuers: Il y a des entrepreneurs qui s'offrent & promettent de faire acheuer en quatre mois, moyennant la somme de quatre cents mille liures; Cocy sauera les habitans de Brabant suiues aux hostilitiez & combustions des contributions qui doivent tous les mois de quatre vingts mille liures, si le tout peut reüssir comme ils ont la croyance, seront assurez de viure doresnauant en paix & repos, admirant & loüant ensemble l'admirable prudence & conduite d'vne si sage Princeſſe qu'vn siecle si malheureux leur desire donner heureusement, Dieu la veuille

conseruer longues annees au profit & contentement de tout son Peuple.

Ce canal qui semble en apparence tant deuoir apporter d'vne part du profit au pays de la Serenissime Princeſſe, cause d'vn autre costé grand dommage à plusieurs autres terres & Prouinces: De sorte que les dommages passeront de beaucoup le bien en apparence qu'il en esperent, car les villes imperiales qui de tout temps ont esté neutrales & ont trafiqué par tout en portent la peine, mesme la ville de Coulogne, Vormbs, Ments, Francfurt, Strasbourg, Nurenbourg, Ausbourg & plusieurs autres, & les marchandises accoustumees de descendre d'Allemagne le long du Rhin iusques en Hollande, & de là estre transportees par mer es pays loingtains, à sçauoir le Royaume de Danemarq, Suede, Poloigne & autres circonuoisins seront frustrez de leur Commerce, car il est bien à presumer que la Serenissime Princeſſe trouuant ce canal commode & profitable (comme cest bien la raison pour son profit) n'ouurira iamais le passage du Rhin, qui est dès y a long-temps fermé, & empeschera de tous costez les Estats de Hollande en leurs commerces negoces lesquels ils practiquoient auparauant.

C'est ainsi que l'invention humaine domine sur les Elemens, les destournans & couduisans à sa volonté, & le profit qu'il pense d'apporter en cela endommage le plus souuent ses voisins, c'est le cours de la vie humaine fondee en contrarietez, la ruyne de l'vn est le bon heur de l'autre, le Ciel & la fortune l'arrachent de l'vn pour donner à l'autre.

Nombre sixiesme, est vn fort Royal bien pourueu de garnison & de toutes sortes de munitions de guerre pour seruir en necessité aux petits forts d'alentour.

Nombre quatorziesme est vn moule fort.

Ces forts sont loing l'vn de l'autre vn quart de lieue, autres vn quart & demy, quelques-uns demy lieue, selon la situation des lieux.

Est vne ville de grande importance, situee sur le passage qui va en Frize, & ordinairement il y a trois mille hommes en garnison bien equippez.

A PARIS,

Ils se vendent rue S. Jacques à l'Enseigne du Libraire Doreur, tout contre le Lyon d'Argent, chez Michel Faulx, graueur en taille douce, à la deuxiesme chambre.

M. DC. XXVII.

Avec Permission.